

# Sproochschwiericheide

Aach om Stommdisch gibts monchmol Daache, doo wird nit iwwer Fußball unn die Bohnnunneführung gekrätscht. Unn wenn wie letzde Sunndaach aach weit unn breit koo neie Kronkheide ausgebroche sinn, kumme merr monchmol vom Hinkelche uffs Gickelche unn aach uffs Audofahrn.

Doo moont de Karl: Moiens, doo iss immer Stau vom Wissbade-ner Kreiz bis zum Fluchhafe. Jeden Daach.

Sacht de Schorsch: Ei woher waaßden dess, Karl? Du host doch doodemett nix mehr ze due.

De Karl gibt zur Antwort: Dess heer ich schunn in aller Herrgotts-frieh, weil die Paula seit verrzeh Daach ferr jeden Moin um drei nooch siwwe de Radiowecker gestellt hott. Awwer ich heer die Staumeldunge, dreh mich uff die onner Seit unn schloof weider.

Ich schittel de Kopp: So Meldunge heer ich merr nor oo, wenn die Fraa sacht, ei merr missde widder mol zu unserne Dechter unn Enkel fahrn.

De Karl grinst: Merr missde widder mol! Dess heert sich so locker oo, awwer eichtlich heeßt dess in de Sprooch von unserne Fraue: Moie fahrn merr! Unn koo Widderredd!

Ja ja, moont de Schorsch, dess sinn alles so Ausdruck, die mussde ersdemol kennelerne. Dedsde merr mol in de Keller gieh? Dess iss doch e Frooch unn koo Uffforderung, aber wehe du gehst nit, doo iss was los.

Ich sach: So isses. Wenn de uff so e „Dedsde merr mol“ nit gleich hippe dust, kimmt die Drohung: Wennde was onnerst se due host, dann geh ich! - awwer was hosden du schunn ze due!

De Karl holt die Luft: Dess iss halt iwwerall dess selwe. Unn bevor de e schlecht Gewisse krieht, doo gehsde halt, obwohl de grad enn Schrauwezieher in de Hond hosd um die Schrauwe on de Dischboo oozeziehe. Dess hottse derr nämlich aach schunn long gesaacht.

Ja ja, habb ich genickt, unn dann gibts joo noch so hinnerlisdiche Hiweise uff ebbes, wasde schunn long emol widder hättst mache solle.

Doo musst de Karl lache: Honnes, du moonst doch, dass wie beim Schorsch ess Kättche om frieh Moin enn Song von de Biedels uffgeleecht hott mett Laaf, Laaf, Laaf, unn de Schorsch nix onnerst ze due hatt als außem Bett ze hippe unn enaus ins Feld ze renne? Nix ferr ungut, Schorsch, awwer was hawwe merr doomols gelacht.

Sacht de Schorsch: Nix ferr ungut, Karl, awwer grad du musst onnern Leit Mäuler mache! - weil du kabierst so hinnerlisdiche Hiweise joo aach nit.

De Karl hott e bisje schepp geguckt: So, unn woher willsden du dess wisse?

Grinst de Schorsch: Hosde nit gesacht, dass die Paula seit verr-zeh Daach ferr korz nooch siwwe de Radiowecker gestellt hott?

Ja unn?, de Karl zuckt mett de Achsele, ich waaß nit wasde willst.

De Schorsch hott noch mehr gegrinst: Karl, was heersden jeden Moin, wenn de Radio oogeh?

Sacht de Karl: Ei ess sellwe wie die Paula, wies drauße uff de Strooße so iss mettem Verkehr.

De Schorsch konnts Lache nimmi halle: Unn du drehst dich uff die onner Seit unn schläfts weider. Awwer drauße uff de Strooße, gell Karl, doo iss moins mords was los!

Eiern Honnes